

Friday, February 20, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



MIZORAM STATEHOOD DAY GREETINGS

Vawiin hi Mizoram State Day vawi 39-na a ni a, President, Vice President, Prime Minister leh ram hruaitu hrang hrang ten Mizoram State Day lawmpuina an hlan.

President Droupadi Murmu chuan Social Media account kaltingin Mizo mipuite state day chibai a buk a, Mizorama chengte chu hnam ziarang mawi tak leh hmun mawi tak nei an ni a ti a, ram hmasawna tura tha an thawhna hrang hrang chu hlu atih thu sawiin hmasawn zel turin duhsakna a hlan a ni.

Vice President CP Radhakrishnan chuan Mizoram chu khuanu kutchhuak mawina tam tak awmna hmun ani a ti a, a ramngaw mawina leh a boruak thiang tak chu India inchhuanna a ni tih sawiin remna leh muanna avanga a hmingthanna chu chhonzawm zel turin a chah a, hmasawn zel turin duhsakna a hlan a ni.

Prime Minister Narendra Modi chuan Mizo hnam ziarang leh nunphung mawi tak chu mipuite hip tu ani a ti a, tualchhung inrelbawlina tha tak leh inunaua tha tak bakah midangte inzah tawn taka an awm chu chhuanawm atih thu sawiin ram hmasawn ruala hmasawn zel turin a chah a ni.

Union Home Minister Amit Shah pawhin Mizoram Statehood Day chibai bukin remna leh muanna avanga an hmingthanna chu chhonzawm zel turin a chah a ni.

Union Health Minister JP Nadda pawhin Mizoram State Day chibai bukin Mizoram mawina leh mipuite thawhrimna chu chhuanawm atih thu a sawi a, state hlim thei tak leh midangte inngaihsakna hmun ani chu chhuanawm atih thu a sawi bawk.

Parliamentary Affairs Minister Kiren Rijiju chuan Mizoram Statehood Day chibai bukin Mizo nunphung leh hnam ziarang mawi tak chu chhuanawm atih thu a sawi a, ram tana ke pen zel turin a sawm a ni.

DoNER Minister Jyotiraditya M. Scindia chuan Mizo mipuiten State ni tura an thawhrimna chu chhuanawm atih thu a sawi a, remna leh muanna avanga an hmingthanna chu hlu atih thu sawiin mipuite State Day hlim taka hmang turin duhsakna a hlan a ni.

Lok Sabha-a Leader of Opposition leh Congress hruaitu Rahul Gandhi pawhin Mizoram Statehood Day chibai bukin Mizoram hnam ziarang leh nunphung mawi tak chu chhuanawm atih thu a sawi a, state chhunga mipuite inlungualna chu chhonzawm zel tha atih thu a sawi bawk.

BJP President Nitin Nabin pawhin Mizo mipuite Statehood Day chibai bukin remna leh muanna kawnga an hmalakna chu chhuanawm atih thu a sawi a, Mizoram chu ram mawi tak mi cheng te nun ze mawi tak awmna ani tih sawiin state chu hmassawn zel turin duhsakna a hlan a ni.



STATE DAY MESSAGE

Mizoram State Day pualin Larsap, Chief Minister leh party hruaituten mipuite State Day chibai a buk.

Gen (Retd) Vijay Kumar Singh chuan Mizoram chu state a nih hnuah muanna, hmasawna leh hlawhtlinna kawng hrangin a zawh chho a ti a, State Day chu Mizo mipuite chhelna, inpumkhatna leh suangtuahna ataka nemnghehna ani tih a sawi.

Larsap chuan Mizoram chu rampum huapa hriat a hlawh thinna hnam ziaranga hausa tak, nunphung nghet tak leh midangte inzahtawn taka awmna hmun ani a ti a, khawtlang inlungualna hloh chuang lovin zirna, hriselna, hmasawna ruhrel din leh ngelnghet siam kawngah pawh nasa takin hma a sawn tih sawiin tanrualna leh inremna nen kum 2047-a India ram intodelh leh mahni kutkea ding thei 'Viksit Bharat' siam turin mipuite thawhpuih a sawm a ni.

Chief Minister Pu Lalduhoma chuan Mizoram mipuite State Day chibai bukin State Day dam taka an thlen theih nachhan chu Mizo mipuite tawngtaina avang ani tih a sawi.

Chief Minister hlui leh MNF President Pu Zoramthanga pawhin Mizo mipuite State Day chibai bukin Mizoram State lo pianchhuahna chu MNF leh India Sorkar Inremna Thuthlung rah a ni a ti a. Peace Accord hlawhtling ber zinga mi an neih theihna kawnga mi tin te tanrualna chu chhuanawm atih thu sawiin Mizoram State Day chu Mizoram chhunga chengte tan mai bakah hmun hrang hranga cheng Mizo mipui zawng zawngte tan a hlu takzet tih a sawi.

BJP Mizoram President Dr K. Beichhua chuan Mizoram Statehood Day pualin mizo mipuite chibai a buk bawk.



STATE DAY OF PRAYER

Vawiin hi Union Territory atanga State-a Mizoram hlankai a nihna champha, 'State Day vawi 39-na a ni a; State Day of Prayer Committee bultumin vawiin hian Mizoram hmun hrang hrangah a tum thumna atan State Day puala tawngtairualna 'State Day of Prayer' neih a ni a, thupui atan 'I din thar leh ang u tih hman niin, chawngheia tawngtaihona pawh neih a ni.

Aizawlah chuan State Day of Prayer hi Lammualah Chief Minister Pu Lalduhoma hova hman a ni a; State Day of Prayer of Worship Team-te kaihhruaiin chawhma dar 10:30 atanga chhun dar 12:30 thleng zaihona leh tawngtai hona neih niin, Aizawl khawpui hmun li atangin kea kawngzawh leh hmun thum atangin two wheeler hmanga kawng zawh a ni a, Lammualah an intawkkhawm a ni.

State Day of Prayer Committee Chairman Rev. Lalramliana Pachuau kaihhruaiin State Day of Prayer puala inkhawm hi neih a ni a; Chief Minister Pu Lalduhoma'n thu a sawi bakah, State Day of Prayer Committee working chairman Pu F. Rodingliana, Minister of State pawhin thu a sawi.

Puan tawh angin State Day of Prayer Committee chairman Rev. Lalramliana Pachuau chuan tunthla ni 13-a thuthar thehdarhtute an kawmnaah State Day puala tawngtaihona tura inbuatsaihna atana senso ngaite hi mi thahnemgaiten an thawh thin thu leh sorkar sum hman a ni loh loh thu a sawi a; State Day puala tawngtaihona atan hian cheng nuai 15 ruahman a nih thu a sawi bawk.

State Day of Prayer hi vawiin khan District dangah pawh hman niin vawiin khan New Siaha-a Presbyterian Kohran biak inah Siaha khawchhunga Kohran hrang hrang ten ram tan tawngtai rualna hun an hmang a, thupui atan 'I din thar leh ang u' tih hman a ni.

Champhai ah chuan New Champhai Field ah Ram leh hnam tan, I din thar leh ang u tih thupuia hmangin hun hman a ni a, Niminah New Champhai khelmual thianfaia hnatlang buatsaih niin nizan khan mi thahnem tak New Champhai Field ah hian Tawngtaiin an tlaivar a ni.

